

■ EDITORIAL

Taschair/quescher

DA RITA CATHOMAS-BEARTH

Taschair/quescher, dus plets, ina muntada: serrar la bucca. Er sch'i para auter è taschair tuttina ina moda da communitgar. Ins quescha cur ch'il cor va suror, en muments da surpraisa, ord tema da far in sbagl e sa blamar, ord tema da svegliar agressiuns tar l'auter, ord tema da vegnir serrà en. Er quel che stat sut al schef autoritar tascha. Taschair po esser expressiun da flavlezza, ma er da fermezza. Viver bain ed avoir success pretenda: discurrer in cun l'auter, tadlar quai che l'auter vul communitgar. Quai è il messadi da Theodore Zeldin en ses cudesch: «Gut leben, ein Kompass der Lebenskunst». Taschair po

avoir l'effect da padella a vapur. Sche la pressiu vegn memia gronda explode-schi. I dat er la metoda da cuschentiar. Sche vuschs aggressivas piglian surmaun en la publicitad tascha la maioritad savens. Che novas tendenzas faschistas sa mussan en divers stadis enturn e manivel da nus è segn d'alarm. Per ch'eveniments sgarschaivels na sa repetian betg hai num avrir la bucca e dir quai ch'è da dir. En cuminanza cun tut quels che vesan il privel.

Atgnamain vulevan quests «accents» tematisar il «taschair». Ma tgi che scriva davart il taschair na po betg far auter che er s'exprimer davart il discurrer.

Redactura responsabla